

## Igl meis da schaner 2021 ò la suprastanza communal tracto tranter oter igls affars suandonts:

### **Immobiglias, fatgs da santieri e da sepultura, provedimaint d'ava**

- Decidia da vender igl anteriour local da pumpiers a Rona. La vendita vign publitgeida a taimp util aint igls figls uffizials digl cumegn, per dar uscheia la pussebladad a tot las persungas interessadas d'inoltrar en'offerta correspondententa.
- Sancziuno e delibero igl inserat pertutgont la vendita da diversas immobiglias communalas per la publicaziun aint igls figls uffizials digl cumegn.

### **Fatgs generals, fatgs da persunal, economia e provedimaint d'energeia**

- Delibero la revisiun parziala davart la lescha da votaziun ed elecziun digl cumegn da Surses per mangs dalla radunanza communal. La fegnameira dalla revisiun è da midar igl modus d'elecziun dalla suprastanza communal. Da nov duessan adegna dus commembers da suprastanza neir eligias an etappas an en turnus da mintgamai dus onns.
- Approvo la renovaziun digls contracts da servitut per igls dretgs da passar cun conducts ed igls dretgs da li concernent igl trassé dallas lengias agl liber da media tensiun dallas Ovras electricas digl martgea da Turitg sen igl territori digl anteriour cumegn da Savognin.
- Fixo las tariffas da canzleia per igl 2021. Las tariffas restan mademas scu igl onn passo.
- Tscharnia igls commembers digl biro electoral digl cumegn per las votaziuns ed elecziuns federalas, cantunalas e regionalas digl 2021.
- Decidia da betg sustignair la proposta sottomessa d'ena gruppaziun da cumegns pertutgont la fundaziun d'ena associaziun da cumegns cantunala.

### **Siertad publica e traffic**

- Decidia da betg acceptar la decisiun negativa digl Uffezi federal da veias UVIAS davart la dumonda digl cumegn d'introduceir tempo 30 sen igl Stradung a Savognin. Per ampruar da pudeir catscher tras la dumonda, vign dumando igl sustign ad instituziuns tgi s'angaschan per fatgs da construcziun tenor igl basigns da persungas cun impedimaints e per la protecziun cunter canera.
- Decidia da realisar la pare da separaziun tranter la veia e digl passape davent digl Punt Caltgera anfignen tar la staziun dallas pendicularas a Lecschi an atschal (an pe da vedèr spezial). La pare da separaziun ò da neir fatga aint igl rom digl project d'investiziun per l'equipaziun e furnaziun nova digl areal Grava a Savognin.

### **Turissem**

- Approvo igl carnet da dueirs per igls commembers dalla cumischung da lavegnas ed igl mess an vigour cun effect retroactiv sen sen igl 1. da december 2020.

### **Fatgs da construcziun, planificaziun digl territori e planisaziun locala**

- Piglia cunaschientscha dalla survista da projects 2021 pertutgont las investiziuns budgetadas e fixo la responsabladad per mintga project scu er igl ulteriour proceder per dumandar offertas e surdar las lavours.
- Decidia da surdar la lavour da sanar igl sistem da direcziun digls process dalla serenera Sotgôt a Cunter all'interpresa Rittmeyer SA.
- Decidia da sottometter agl cumegn d'urna la proposta da conceder alla Kieswerk Bovas SA Lantsch/Lenz en dretg da biagier pertutgont ena surfatscha parziala dalla parcella nr. 5048 ainten la zona d'industria Punt a Cunter. Chel dretg da biagier duess neir per pudeir dissolver igl sies dretg da biagier existent a Tinizong, a favour digl project «resurses2025» dalla Uffer SA per realisar en center per l'elaboraziun da lenna.

**Ovras communalas incl. infrastruttura turistica, economia forestala**

- Approvo la convagnientscha pertutgont la surdada operativa digl menaschi "rezgia communalina Tinizong" ed igl contract da dretg da biagier pertutgont la parcella nr. 345, Plaz la Rezia, a Tinizong, cun la Uffer SA. Chels contracts èn la premissa per pudeir realisar igl project "resurses2025" dalla Uffer SA.

Tinizong, igls 08-02-2021

Suprastanza communalina Surses